

olarak bi'l-imtihân derse çıktım ve üç yüz otuz sene-i hicriyyesinde icâzet vermeye muvaffak oldum lisân-ı Türkî ile tekellüm ve kitâbet ederim. Tab' ve neşrolunmuş bir eserim yoktur.

4- Hâl-i hâzırda hizmet-i devlette bulunmadığım gibi evvelce dahi devlet hizmetinde bulunmadım.

5- Postnişîni bulunduğum dergâh-ı şerîfin nâm-ı meşhûru Üsküdar'da Çınar kurbünde Selim Efendi Dergâh-ı şerîfi olup meşîhat ciheti fi Ramazan sene [1]336 [1917/1918] târihinde uhdeme tevcih olunmuşdur.

6- Bânîsi Selim Efendi olup ikinci bânîsi yoktur. Târih-i binâsı yakînen ma'lûmum değildir.

7- Dergâhın esâsen mensûb olduğu tarîkat-i aliyye, tarîkat-i Nakşibendî olduğu gibi el-yevm erkânı icrâ edilmekte olan tarîkat dahi tarîkat-i mezkûredir. Perşembe günleri ba'de'z-zuhr icrâ-yı erkân edilmektedir. El-yevm ma'mûrdur.

8- Hulefâm yoktur.

9- Üsküdar'da Çınar kurbünde Selim Efendi Dergâh-ı şerîfi postnişîni mucîz dersiâmdan Balçıklı Ahmed Kemal.

İşbu terceme-i hâl varakası Çınar'da kâin Selim Baba Dergâh-ı şerîfi postnişîni efendi tarafından i'tâ kılınmağla şerh verildi.

Sıra: 9

IST_MFT_MSH_SAID_0254_0025_1_1337H_Safer_18 [23 Kasım 1918]_N

Abdullah Nâsîh Efendi.

Suâller:

1- Terceme-i hâl sâhibinin isim ve mahlası ve şöhret ve lakabı, bir sülâle-i ma'rûfeye mensûb ise keyfiyyet-i nisbeti, mezheb-i i'tikâdî ve amelîsi ve hangi tarîkten müstahlef olduğu ve târih-i intisâbıyla müstahlef oluncaya kadar müddet-i hizmeti ve şeyhinin isim ve şöhreti?

2- Târih ve mahall-i vilâdeti ve pederinin isim ve şöhreti?

3- Resmî ve husûsî hangi mekteb ve medreselerde yâhud muallim-i mahsûsdan hangi ilim ve fen ve sanat ve lisânları ne dereceye kadar tahsîl eylediği, şehâdetnâme ve tasdiknâme ve icâzetnâme alıp almadığı, almış ise târihleri, hangi lisânlarla kitâbet yâhud yalnız tekellüm ettiği, tab ve neşrolunmuş eser ve te'lîfi var ise neye dâir olup ne zaman ve nerede tab ve neşrolunduğu?

4- Hâl-i hâzırda veyâhud evvelce hizmet-i devlette bulunup bulunmadığı?

5- Postnişîni bulunduğu dergâh-ı şerîfin bir veya müteaddid ismi ve ne nâm ile yâd olunduğu ve semt-i meşhûru ve meşîhat cihetinin târih-i tevcihi?

6- Bânîsinin ve ikinci bânîsi var ise isimleri ve târih-i binâsı?

7- Dergâhın esâsen mensûb olduğu tarîkat-i aliyye ile el-yevm erkânı icrâ edilmekte olan tarîkat-ı aliyyenin ismi, eyyâm ve leyâli-i mahsûsası, el-yevm icrâ-yı erkân edilmemekte ise sebebi?

Dergâhta meşîhatten mâ'adâ cihât-ı sâirenin meşrût ve mevcûd olup olmadığı ve kimlerin uhdelerinde bulunduğu ve dergâhın ma'mûlün-bih ve müseccel vakfiyesi bulunup bulunmadığı ve vakfiyesi yok ise te'âmül-i kadîmi neden ibâret olduğu?

8- Sâhib-i tercemenin hulefâsı var ise isim ve şöhretleri ve mahal ve târih-i vilâdetleri ve inâbe eden dervîşânın adedi?

9- İşbu varakada muharrer suâllerin cevâbları alâ-vechî's-sihha cevâb hânelerine tahrîr ve zîr-i varaka imzâ ve tahtîm edildikten sonra merkezlerden ve merkez bulunan tekâyâ meşâyihinin terâcim-i ahvâli Sermüfettişlik'ten ba'de't-tasdîk Meclis'e tevdi' olunacaktır. Bir me'mûriyette bulunup da evvelce terceme-i hâl varaka-i resmiyyesi i'tâ etmiş olan zevât dahi Meclis-i Meşâyih Nizâmnâmesi ahkâmına tebe'an işbu varakayı imlâ edeceklerdir.

Cevaplar:

1- İsmim Abdullah Nâsîh ve Hazret-i Himmet -kuddise sırruhu'l-azîz- hazretlerinin evlâdındanım. İ'tikâdım ehl-i sünnet ve'l-cemâ'at mezhebim İmâm-ı A'zam Ebû Hanîfe hazretlerinin mezhebidir. Tarîkim tarîk-i Bayramiyye'nin Himmetî kolundan ve intisâbım yirmi seneye karîbdir ve şeyhim ammim Himmetzâde merhûm Şeyh Hüsâmeddin Efendi'dir.

2- Mahall-i tevellüdüm el-yevm bulunmakta olduğum dergâhtır. Târih-i tevellüdüm hicrî 1282, rûmî 1281 [1865]'tir. Pederim merhûm Şeyh Abdüşşekûr Efendi'dir.

3- Mekâtib-i ibtidâiyye ve sonra rüşdiyye-i askeriyye ba'dehû idâdî-i tibbiyyeden bâ-şehâdetnâme ve ba'dehû Mekteb-i Tibbiyye-i Şâhaneden bâ-diploma sınıfının birincisi olarak neş'et eyledim. Mesleğime âid bir eseri Türkçe'ye tercemeye muktedir olduğum ve Nâsîh ve Saç ve Sakal Hakkında Mütâlaât-ı Sıhhiyye nâmında hıfzu's-sihhaya müte'allik iki ufak tab' edilmiş eser-i nâcizanem bulunduğu ma'rûzdur.

4- Önce yüzbaşılıkla mektebden neş'etle kaymakamlığa irtifâ ve Otuzuncu Erzincan Fırkası Sertabâbeti'nden mübtelâ olduğum şeker hastalığına binâ'en tekâ'üd oldum. Dördüncü Osmanî ve Mecîdî nişânlarıyla Liyâkat ve Yunan Muhârebe madalyalarını hâiz bulunduğum ve hâl-i hâzırda hiçbir hizmette bulunmadığım ma'rûzdur.

5- Hâdimi bulunduğum dergâh-ı şerîfin nâm-ı evveline nisbetle Hacı Murad b. Abdullah, ba'dehû Kutbül'aktâb Bezcizâde Muhyiddin Efendi ve ba'dehû ceddîm Hazret-i Himmet -kuddise sırruhu'l-azîz- hazretlerinin nâmlarıyla yâd edildiği gibi dergâhın derûnundaki namazgâhda Sürücü Dede Zâviyesi nâmıyla mevsûktur ve semt-i Üsküdar'da fazîletli Ahmed Efendi mahallesinde Salı Sokağı'nda Salı Tekkesi nâmıyla ma'rûftur.

6- Ber-vech-i bâlâ zevât tarafından binâ ve tesis kılınmış ve târih-i binâsı bin kırktır. Târih-i tevcihi 1333 senesi Haziran'ının beşinde tevcih buyurulmuştur.

7- Dergâh-ı şerifte salı günleri tarîk-i Bayramiyye'nin Himmetî kolu üzerine icrâ-yı âyîn edilmektedir. Evvelce asker tarafından işgâl edilerek tahribât vuku' bulmuş ise de taraf-ı dâiyânemden mümkün mertebe ta'mirâtı bi'l-icrâ târih-i tevcihinden bu güne kadar lehül-hamd dergâh-ı şerif küşâde ve icrâ-yı âyîn edilmektedir. Dergâh-ı şerîfin cihât-ı sâiresi bulunmadığı ve vakfiyelerinin olduğunu hâl-i sabâvetimde görmüş isem de el-yevm elde mevcut vakfiyesi olmayıp birâderim merhûm Abdülhay Efendi'nin veresi tarafından kaybedildiği bildirildiği ma'rûzdur.

8- Dergâhın pek çok muhibbân ve züvvârı mevcuttur. Benim bir adet dervîşim vardır. Polis komiserliğinden mütekâ'id Şükrü Efendi'dir.

9- Üsküdar'da Kazasker Ahmed Efendi mahallesinde kâin Salı Dergâh-ı şerîfi hâdimi, Seyyid Abdullah Himmetzâde. İşbu terceme-i hâl varakası Hazret-i Himmet Dergâh-ı şerîfi postnişîni efendi tarafından i'tâ olunmakla şerh verildi.